

Malaysian Online E-resources Consortium (MOLEC)

Oleh: Norazlynne Mohd. Johan



Bermula dengan Jawatankuasa Pangkalan Data Komersil atau singkatannya JKPDK dan kini dikenamakan pada tahun 2010 sebagai Malaysian Online E-Resources Consortium atau singkatannya MOLEC telah ditubuhkan seawal tahun 1999 dengan keanggotaannya terdiri daripada perpustakaan akademik Institusi Pengajian Tinggi Awam (IPTA) dan Institusi Pengajian Tinggi Swasta (IPTS) di Malaysia. JKPDK diletakkan di bawah naungan Persidangan Perpustakaan Universiti dan Negara (PERPUN) dimana secara automatik, pengurus JKPDK dilantik oleh PERPUN. Sehingga tahun 2010, JKPDK telah dipimpin secara bergilir oleh Ketua Pustakawan Universiti Kebangsaan Malaysia (UKM), Universiti Islam Antarabangsa Malaysia (UIAM) dan terkini Universiti Malaya (UM).

Keanggotaan MOLEC berkembang di kalangan pustakawan bersiri di IPTA dan PTS terpilih kepada perpustakaan khusus dan penyelidikan. Perluasan keanggotaan MOLEC sememangnya menjadi salah satu faktor pemantapan kuasa pelanggan melalui proses rundingan harga, penawaran harga consortium oleh penerbit terkemuka dan kajian mendalam berkaitan hak pelanggan sebagai mana termaktub di dalam lesen perjanjian langganan. Dengan peredaran masa, MOLEC telah terbukti memainkan peranan penting sebagai platform komunikasi di antara penerbit dan pembekal perkhidmatan dengan perpustakaan di Malaysia.

MOLEC telah menjalankan pelbagai inisiatif untuk menambahbaik proses langganan dan perolehan kepada sumber maklumat elektronik di kalangan perpustakaan akademik di Negara ini. Selepas 10 tahun, MOLEC boleh berbangga dengan nilai pertambahan perkhidmatan yang diberikan terutama dalam aspek perkongsian maklumat dan kerjasama. Pustakawan bahan bersiri di Malaysia telah memanfaatkan sumber yang dibangunkan oleh MOLEC meliputi garis panduan penilaian pembekal, Senarai Induk Pangkalan Data Komersil, catalog induk bahan bersiri atau MyULIS dan yang paling penting akses kepada sumber elektronik tajaan Kementerian Pendidikan Malaysia. MOLEC juga telah memainkan peranan dalam memperkasakan kompetensi pustakawan melalui bengkel dan latihan berterusan bersesuaian dengan keperluan semasa. Bengkel yang dianjurkan meliputi Bengkel Return on Investment, Bengkel MyULIS, Bengkel Perundingan Berkesan serta latihan penggunaan pangkalan data dari masa ke semasa.

Komunikasi di antara anggota MOLEC diperkasakan melalui pelbagai aktiviti meliputi mesyuarat, projek pemantapan proses dalaman, projek pembangunan sumber dan bengkel tahunan yang dahulunya dikenali sebagai Bengkel JKPDK. MOLEC kini menjadi platform rujukan dan rundingan bagi ahli-ahlinya terutama dalam aspek penetapan kos langganan, kenaikan kos tahunan,

penentuan dalam pemilihan sumber elektronik bagi bidang tertentu dan pengalaman berkaitan konsep model langganan yang ditawarkan oleh penerbit atas talian. Bagi anggota MOLEC, komunikasi secara e-mel dalam pelbagai isu kini dijayakan dengan komitmen semua ahli.

Pada tahun 2010, penjenamaan JKPDK kepada MOLEC adalah selaras dengan hasrat untuk mengangkat jawatankuasa ini ke tahap yang lebih tinggi iaitu secara global sebagai mana dibuktikan oleh kejayaan Korea Research and Information Service (KRIS), Group of 8 (Go8), SCONUL dan pelbagai lagi. Penjenamaan MOLEC juga membawa jawatankuasa ini kepada peranan yang lebih luas iaitu sebagai *Buying Club* bagi perpustakaan di Malaysia. MOLEC beriltizam ke arah meningkatkan kuasa pelanggan di mata pembekal perkhidmatan, memastikan kejayaan rundingan harga berlandaskan situasi menang-menang dan mencapai keberkesanan kos langganan bagi jangka masa panjang.

Sumber:

<http://dspace.unimap.edu.my/dspace/bitstream/123456789/10395/1/Pengukuran%20prestasi%20sumber%20elektronik.pengalaman%20MOLEC.pdf>